

საქართველოს ტექნიკური უნივერსიტეტის  
სტუდენტური თვითმმართველობის  
საარჩევნო დებულება

თბილისი 2022 წელი

## სარჩევი

### თავი I - ზოგადი ნაწილი

მუხლი 1. რეგულირების სფერო

მუხლი 2. სამართლებრივი საფუძვლები

მუხლი 3. ტერმინთა განმარტება

მუხლი 4. ამ დებულებით დადგენილი ვადების ათვლა

### თავი II - ამომრჩეველთა რეგისტრაცია

მუხლი 5. ამომრჩეველთა ერთიანი სია და მისი ფორმირების წესი

### თავი III - საარჩევნო სისტემა

მუხლი 6. საარჩევნო უბნები

მუხლი 7. არჩევნების ჩატარების სისტემა

მუხლი 8. ხმის მიცემის სისტემა

### თავი IV - საარჩევნო ადმინისტრაცია

მუხლი 9. საარჩევნო ადმინისტრაციის სტატუსი და სისტემა

მუხლი 10. საარჩევნო კომისიის შემადგენლობა

მუხლი 11. საარჩევნო კომისიის წევრის უფლება-მოვალეობანი

მუხლი 12. საარჩევნო კომისიის წევრის უფლებამოსილების ვადა

მუხლი 13. საარჩევნო კომისიის წევრის უფლებამოსილების ვადამდე შეწყვეტა

მუხლი 14. საარჩევნო კომისიის მუშაობის წესი

მუხლი 15. საარჩევნო ადმინისტრაციის აქტები

მუხლი 16. საარჩევნო კომისიის უფლებამოსილება

მუხლი 17. საარჩევნო კომისიის აპარატი

### თავი V - საარჩევნო სუბიექტთა რეგისტრაცია

მუხლი 18. საარჩევნო სუბიექტთა რეგისტრაცია

მუხლი 19. საარჩევნო სუბიექტთა რეგისტრაცია (კრიტერიუმები)

### თავი VI - არჩევნების დაფინანსება

მუხლი 20. არჩევნების დაფინანსება

### თავი VII - კენჭისყრა

მუხლი 21. კენჭისყრის დრო და ადგილი

- მუხლი 22. საარჩევნო ბიულეტენი
- მუხლი 23. კენჭისყრისა და არჩევნების შედეგების შემაჯამებელი ოქმები
- მუხლი 24. დამკვირვებლები
- მუხლი 25. დამკვირვებელთა რეგისტრაცია
- მუხლი 26. საარჩევნო უბნის გახსნა
- მუხლი 27. საარჩევნო ბიულეტენის გაცემა
- მუხლი 28. კენჭისყრის ჩატარება
- მუხლი 29. კენჭისყრის დღეს კენჭისყრის ოთახში წესრიგის დაცვა
- მუხლი 30. საარჩევნო ყუთის გახსნამდე ჩასატარებელი პროცედურები
- მუხლი 31. საარჩევნო ყუთის გახსნა
- მუხლი 32. ხმის დათვლა
- მუხლი 33. კენჭისყრის შედეგების შემაჯამებელი ოქმი
- მუხლი 34. განცხადებები და საჩივრები კენჭისყრისა და ხმის დათვლის პროცედურების დარღვევებზე
- მუხლი 35. კენჭისყრისა და არჩევნების შედეგების შეჯამება საარჩევნო კომისიაში

#### თავი VIII - დასკვნითი დებულებები

- მუხლი 36. მანდატის მიკუთვნება
- მუხლი 37. უნივერსიტეტის სტუდენტური თვითმმართველობის პირველი სხდომა

#### თავი IX - გარდამავალი დებულებები

- მუხლი 38. არჩევნების ჩატარების თარიღი

არჩევნები ტარდება 2022 წლის 26 დეკემბერს.

საქართველოს ტექნიკური უნივერსიტეტის  
სტუდენტური თვითმმართველობის  
არჩევნების დებულება

თავი I - ზოგადი ნაწილი

მუხლი 1. რეგულირების სფერო

ეს დებულება ადგენს საქართველოს ტექნიკური უნივერსიტეტის (შემდგომში სტუ) ფაკულტეტების სტუდენტური თვითმმართველობის არჩევნების მომზადებისა და ჩატარების წესს, არჩევნებში მონაწილე პირთა უფლებებს, საარჩევნო ადმინისტრაციის შექმნის წესსა და უფლებამოსილებას, დებულებით გათვალისწინებულ შემთხვევებში დავის განხილვის წესს.

მუხლი 2. სამართლებრივი საფუძვლები

სტუ-ის სტუდენტური თვითმმართველობის ორგანოს არჩევნების სამართლებრივ საფუძველს წარმოადგენს კანონი „უმაღლესი განათლების შესახებ”, საქართველოს ტექნიკური უნივერსიტეტის წესდება, მოქმედი სტუდენტური თვითმმართველობის დებულება, მოცემული დებულება და ამ დებულების ფარგლებში შექმნილი საარჩევნო ადმინისტრაციის აქტები.

მუხლი 3. ტერმინთა განმარტება

ამ დებულების მიზნებისათვის გამოყენებულ ტერმინებს აქვთ შემდეგი მნიშვნელობა:

- ა) არჩევნები – სტუ-ის სტუდენტური თვითმმართველობის წევრთა არჩევის პროცესი;
- ბ) საარჩევნო უფლება – აქტიური და პასიური საარჩევნო უფლება;
- გ) აქტიური საარჩევნო უფლება – სტუდენტის უფლება მიიღოს მონაწილეობა ფაკულტეტის სტუდენტური თვითმმართველობის წარმომადგენლობითი ორგანოს არჩევნებში;
- დ) პასიური საარჩევნო უფლება – სტუდენტის უფლება, კენჭი იყაროს ფაკულტეტის თვითმმართველობის წარმომადგენლობით ორგანოში ასარჩევად;
- ე) საარჩევნო რეგისტრაცია – შესაბამისი საარჩევნო კომისიის მიერ სტუდენტების რეგისტრაცია არჩევნებში მონაწილეობის უფლების მისაღებად;
- ვ) საარჩევნო სუბიექტი – ამ დებულების საფუძველზე რეგისტრირებული კანდიდატი;
- ზ) საარჩევნო ადმინისტრაცია – ამ დებულების საფუძველზე შექმნილი საარჩევნო კომისია;
- თ) წინასაარჩევნო კამპანია – საარჩევნო სუბიექტობის კანდიდატისა და საარჩევნო სუბიექტის მიერ არჩევნებში მონაწილეობისა და გამარჯვების მიზნით ჩატარებულ ღონისძიებათა ერთობლიობა;
- ი) წინასაარჩევნო აგიტაცია საარჩევნო სუბიექტების მიერ ამომრჩეველთა მოწოდება ამა თუ იმ საარჩევნო სუბიექტის მხარდასაჭერად;

- კ) განმეორებითი კენჭისყრა – კენჭისყრა, რომელიც განმეორებით იმართება იმ საარჩევნო უბანში (უბნებში), რომელშიც (რომლებშიც) ბათილად იქნა ცნობილი კენჭისყრის შედეგი;
- ღ) არჩევნების დასასრული – საარჩევნო კომისიის მიერ დამტკიცებული არჩევნების საბოლოო შედეგების (განმეორებითი კენჭისყრის ჩათვლით) შემაჯამებელი ოქმის გამოქვეყნება;
- მ) არჩევნების დღე (კენჭისყრის დღე) – საერთო ან ხელახალი არჩევნების ჩატარების დღე;
- ნ) საარჩევნო დოკუმენტაცია – საარჩევნო კომისიაში შესული და საარჩევნო კომისიდან გასული განცხადებები, საჩივრები, წერილები, საქმიანი ქაღალდები, ოქმები, საარჩევნო ბიულეტენები, სპეციალური კონვერტები, საარჩევნო ადმინისტრაციის აქტები, საკონტროლო ფურცლები, სარეგისტრაციო ჟურნალები, ამომრჩეველთა სიები და სხვა დოკუმენტაცია;
- ო) სარეგისტრაციო ჟურნალი – ზონარგაყრილი წიგნი, რომლის ზონარიც ილუქება, დასალუქ ფურცელს ხელს აწერს საარჩევნო კომისიის მდივანი და დაქმევა საარჩევნო კომისიის ბეჭედი. მისი ყველა გვერდი დანომრილია და ახლავს საარჩევნო უბნის ნომერი;
- პ) საბუთების შეფუთვა – საბუთების იმგვარად შეკვრა ან ყუთში ჩაწყობა, რომ შეკვრის (ყუთის) დალუქვის შემდეგ ლუქის დაუზიანებლად შეუძლებელი იყოს შეკვრიდან (ყუთიდან) რაიმეს ამოღება ან მასში რაიმეს ჩადება;
- ჟ) ლუქი – ქაღალდის ზოლი, დაწებებული საარჩევნო მოწყობილობის, საბუთების შესაფუთი ყუთის, საბუთების შეკვრის, სარეგისტრაციო ჟურნალის, კენჭისყრის დღის გახსნის ადგილებზე, რომელზეც აღინიშნება დალუქვის თარიღი და დრო და რომელსაც ხელს აწერენ ამ დებულებით განსაზღვრული პირები;
- რ) ამომრჩეველი – სტუდენტი, რომლის მონაცემებიც შეტანილია ამომრჩეველთა სიაში.

#### მუხლი 4. ამ დებულებით დადგენილი ვადების ათვლა

ამ დებულებით დადგენილი ყველა ვადა, მათ შორის, არჩევნების დაწყებიდან მის დასრულებამდე, გულისხმობს კალენდარულ დღეებს (საქართველოს შრომის კანონმდებლობით დადგენილი უქმე და დასვენების დღეების ჩათვლით).

4.1 კანდიდატთა რეგისტრაცია იწყება არჩევნების გამოცხადების შესახებ სტუდენტური თვითმმართველობის გამგეობის მიერ დადგენილების გამოცემიდან 7 დღის შემდეგ და მიმდინარეობს 7 დღის განმავლობაში, ხოლო არჩევნები ტარდება რეგისტრაციის დასრულებიდან მე-8 დღეს.

#### თავი II - ამომრჩეველთა რეგისტრაცია

#### მუხლი 5. ამომრჩეველთა ერთიანი სია და მისი ფორმირების წესი

1. ამომრჩეველთა ერთიანი სია არის ამ დებულებით დადგენილი წესით რეგისტრირებულ, აქტიური საარჩევნო უფლების მქონე სტუდენტთა სია, რომელიც წარმოდგენილია ფაკულტეტებისა და კურსების მიხედვით.

2. ამომრჩეველთა ერთიან სიაში შეტანილ უნდა იქნეს სტუდენტის შესახებ შემდეგი ინფორმაცია:
  - ა) გვარი, სახელი, პირადი ნომერი;
  - ბ) ფაკულტეტი;
3. ამომრჩეველთა ერთიან სიაში სტუდენტის მონაცემები შეტანილ უნდა იქნეს მისი ფაკულტეტის მიხედვით.
- 4 საარჩევნო კომისია უზრუნველყოფს ამომრჩეველთა ერთიანი სიის კომპიუტერულ დამუშავებას.
5. ამომრჩეველთა ერთიანი სია შედგენილ უნდა იქნეს ფაკულტეტების უნივერსიტეტის სწავლების დეპარტამენტის ან/და დეკანატების მიერ მიწოდებული ინფორმაციის საფუძველზე.
6. საარჩევნო კომისია უზრუნველყოფს ამომრჩეველთა ერთიანი სიის საჯაროობასა და ხელმისაწვდომობას. არჩევნებამდე 5 დღით ადრე საარჩევნო კომისია ვალდებულია გამოაკრას ამომრჩეველთა სიები ფაკულტეტებზე შექმნილ შესაბამის საარჩევნო უბნებთან.
7. თუ სტუდენტის მონაცემები არ იქნება ან არასწორად იქნება დაფიქსირებული ამომჩეველთა სიაში, არჩევნების დღეს სტუდენტს უფლება აქვს მიმართოს საარჩევნო კომისიას დამატებით სიაში შეყვანის ან ამომრჩეველთა სიაში დაშვებული შეცდომის გასწორების მოთხოვნით. საარჩევნო კომისიას სტუდენტმა უნდა წარუდგინოს:
  - ა) ცნობა მისი ფაკულტეტის დეკანატიდან იმის შესახებ, რომ ის ნამდვილად ირიცხება შესაბამის ფაკულტეტზე;
  - ბ) პირადობის მოწმობა, აკადემიური მოსწრების წიგნაკი ან სტუდენტური ბილეთი.

### თავი III - საარჩევნო სისტემა

#### მუხლი 6. საარჩევნო უბნები

არჩევნების ორგანიზებისათვის საარჩევნო უბნები შესაძლებელია დაიყოს ფაკულტეტების მიხედვით შექმნილ არანაკლებ 12 საარჩევნო უბნად.

#### მუხლი 7. არჩევნების ჩატარების სისტემა

პირდაპირი არჩევის საფუძველზე (ე.წ. მაჟორიტარული სისტემით).

#### მუხლი 8. ხმის მიცემის სისტემა

1. თითოეული ამომრჩეველი ხმას აძლევს არა უმეტეს ფაკულტეტის მიხედვით დადგენილი ვაკანტური მანდატების მაქსიმალური რაოდენობისა.
2. არჩევნები ჩატარებულად ჩაითვლება თუ მასში მონაწილეობას მიიღებს ფაკულტეტის სტუდენტთა შემადგენლობის მინიმუმ 1/4.

თავი IV - საარჩევნო ადმინისტრაცია (ცენტრალური და საფაკულტეტო საარჩევნო კომისია)

#### მუხლი 9. საარჩევნო ადმინისტრაციის სტატუსი და სისტემა

1. საარჩევნო კომისია წარმოადგენს საარჩევნო ადმინისტრაციას, რომელიც ამ დებულებით განსაზღვრულ ფარგლებში უზრუნველყოფს სტუ-ის სტუდენტური თვითმმართველობის არჩევნების ჩატარებას.
2. ცენტრალური საარჩევნო კომისიის წევრთა რაოდენობა უნდა შედგებოდეს არანაკლებ 5 და არაუმეტეს 9 წევრისაგან და შემადგენლობა დგინდება მოქმედი სტუდენტური თვითმმართველობის გამგეობის მიერ დამსწრე წევრთა უბრალო ხმათა უმრავლესობით არჩევნების შესახებ გამოცემული დადგენილებიდან არაუგვიანეს 5 დღისა.
3. ცენტრალური საარჩევნო კომისია უზრუნველყობს საქართველოს ტექნიკურ უნივერსიტეტში არჩევნების ჩატარებას, ხოლო საფაკულტეტო საარჩევნო კომისია უზრუნველყოფს ფაკულტეტების მიხედვით არჩევნების ჩატარებას.
4. ცენტრალური საარჩევნო კომისიის წევრად შეიძლება დანიშნულ იქნეს საქართველოს ნებისმიერი მოქალაქე, სტუ-ის თანამშრომელი ან სტუდენტი სტუ-ის სტუდენტური თვითმმართველობის გამგეობის წევრთა მინიმუმ 2/3-ის წარდგინებით, კომისიის წევრთა ერთი კანდიდატის დასახელების უფლება, სურვილის შემთხვევაში ასევე აქვს ამ დებულების განხილვაში და სტუდენტური თვითმმართველობის არჩევნებში მონაწილე ნებისმიერ სუბიექტს თუ მას მხარს დაუჭერს მოქმედი სტუდენტური თვითმმართველობის გამგეობის წევრთა უმრავლესობა.
5. საფაკულტეტო (საუბნო) საარჩევნო კომისიის წევრად შეიძლება დანიშნულ იქნეს საქართველოს ნებისმიერი მოქალაქე, სტუ-ის თანამშრომელი ან სტუდენტი სტუ-ის სტუდენტური თვითმმართველობის გამგეობის წევრთა მინიმუმ 2/3-ის წარდგინებით კომისიის წევრთა ერთი კანდიდატის დასახელების უფლება სურვილის შემთხვევაში ასევე აქვს ამ დებულების განხილვაში და სტუდენტური თვითმმართველობის არჩევნებში მონაწილე ნებისმიერ სუბიექტს თუ მას მხარს დაუჭერს მოქმედი სტუდენტური თვითმმართველობის გამგეობის წევრთა უმრავლესობა.
5. ამ დებულებით დადგენილი წესით, საარჩევნო კომისია ქმნის საარჩევნო უბნებს.
6. საარჩევნო ადმინისტრაცია თავისი უფლებამოსილების განხორციელებაში დამოუკიდებელია.

#### მუხლი 10. საარჩევნო კომისიის შემადგენლობა

1. ცენტრალური საარჩევნო კომისია შედგება არანაკლებ 5 და არაუმეტეს 9 წევრისაგან, რომელიც დაკომპლექტებულია ამ დებულების მე-4 თავის მე-9 მუხლის ქვეპუნქტების მიხედვით გათვალისწინებული ნორმების შესაბამისად.
2. საარჩევნო კომისია შედგება კომისიის თავმჯდომარის, თავმჯდომარის მოადგილის, კომისიის მდივნისა და კომისიის წევრებისაგან.
3. საუბნო საარჩევნო კომისიის რაოდენობა განისაზღვრება ფაკულტეტის თითო უბანზე არანაკლებ 5 და არაუმეტეს 9 წევრისაგან.

4. საფაკულტეტო (საუბნო) საარჩევნო კომისიები, არჩევნების დღეს უბნებზე უზრუნველყოფენ არჩევნების ჩატარებას. საუბნო კომისიები იქმნება კომისიის თავმჯდომარის, თავმჯდომარის მოადგილის, კომისიის მდივნის და კომისიის წევრების შემადგენლობით.

#### მუხლი 11. საარჩევნო კომისიის წევრის უფლება-მოვალეობანი

1. საარჩევნო კომისიის წევრი ვალდებულია კომისიის წევრად დანიშვნის დღიდან მონაწილეობა მიიღოს მის საქმიანობაში.
2. საარჩევნო კომისიის წევრები ვალდებული არიან ხელი მოაწერონ კენჭისყრის ან არჩევნების შედეგების შემაჯამებელ ოქმს, ხოლო თუ კომისიის წევრი არ ეთანხმება ოქმში შეტანილ მონაცემებს, უფლებამოსილია აღნიშნულის თაობაზე მიუთითოს ხელმოწერის გასწვრივ და განსხვავებული აზრი დაურთოს ოქმს წერილობით.
3. საარჩევნო კომისიის წევრი თავის საქმიანობაში დამოუკიდებელია და ემორჩილება მხოლოდ კანონს და ამ დებულებას. აკრძალულია საარჩევნო კომისიის წევრზე ზემოქმედება ან მის საქმიანობაში ჩარევა გადაწყვეტილების მიღებაზე ზეგავლენის მიზნით.

#### მუხლი 12. საარჩევნო კომისიის წევრის უფლებამოსილების ვადა

1. საარჩევნო კომისიის წევრის უფლებამოსილების ვადა იწყება საარჩევნო კომისიის პირველი შეკრების დღიდან და წყდება ამ დებულებით გათვალისწინებული ყველა პროცედურის დასრულებისთანავე.
2. კომისიის წევრის უფლებამოსილება წყდება კომისიაში მისი შემცვლელი წევრის არჩევისთანავე.

#### მუხლი 13. საარჩევნო კომისიის წევრის უფლებამოსილების ვადამდე შეწყვეტა

1. ცენტრალური (საუნივერსიტეტო) და საუბნო (საფაკულტეტო) საარჩევნო კომისიის წევრისთვის უფლებამოსილების ვადამდე შეწყვეტის საკითხს წყვეტს ცენტრალური საარჩევნო კომისია.

კომისიის წევრს უფლებამოსილება შეიძლება შეუწყდეს:

- ა) პირადი განცხადებით;
- ბ) არასაპატიო მიზეზით ზედიზედ 1 კვირის განმავლობაში საარჩევნო კომისიის წევრის უფლებამოსილების შეუსრულებლობის ან არასაპატიო მიზეზით საარჩევნო კომისიის სხდომის ზედიზედ 2-ჯერ გაცდენის შემთხვევაში.
2. საარჩევნო კომისიის თავმჯდომარე, თავმჯდომარის მოადგილეები, მდივნები თანამდებობიდან ვადამდე თავისუფლდებიან ცენტრალური საარჩევნო კომისიის თავმჯდომარის ბრძანებით.
3. აკრძალულია საარჩევნო კომისიის წევრის გამოწვევა არჩევნებამდე 5 დღით ადრე.

#### მუხლი 14. საარჩევნო კომისიის მუშაობის წესი

1. საარჩევნო კომისიის მუშაობის წესი განისაზღვრება ამ დებულებით.

2. საარჩევნო კომისიის თავმჯდომარის არყოფნის შემთხვევაში მის მოვალეობას ასრულებს თავმჯდომარის მოადგილე.
3. საარჩევნო კომისიის სხდომების პერიოდულობას განსაზღვრავს კომისია. აუცილებლობის შემთხვევაში, კომისიის თავმჯდომარის ან კომისიის წევრთა 1/3-ის მოთხოვნით მოიწვევა რიგგარეშე სხდომა.
4. სხდომა უფლებამოსილია, თუ მას ესწრება კომისიის სრული შემადგენლობის უმრავლესობა.
5. კომისიის გადაწყვეტილება მიღებულად ჩაითვლება თუ მას მხარს დაუჭერს დამსწრეთა უმრავლესობა, მაგრამ არანაკლებ სრული შემადგენლობის ერთი მესამედისა.
6. ხმების თანაბრად გაყოფის შემთხვევაში გადამწყვეტია თავმჯდომარის ხმა.
7. სხდომაზე საკადრო საკითხები წყდება კომისიის სრული შემადგენლობის უბრალო უმრავლესობით.
8. სხდომაზე დგება ოქმი, რომელსაც ხელს აწერენ სხდომის თავმჯდომარე და კომისიის მდივანი.
9. სხდომის ოქმი ფორმდება სხდომიდან 1 დღის ვადაში.
10. საარჩევნო კომისიის წევრს, რომელიც არ ეთანხმება კომისიის გადაწყვეტილებას, უფლება აქვს წერილობით გამოთქვას განსხვავებული აზრი, რომელიც ერთვის ოქმს.
11. განცხადების (საჩივრის) მიღებისას საარჩევნო კომისიის სარეგისტრაციო ჟურნალსა და განმცხადებლისთვის (მომჩივნისთვის) გადაცემულ ცნობაში აღინიშნება მისი მიღების თარიღი და დრო. კომისია განიხილავს განცხადებას (საჩივარს) და იღებს სათანადო გადაწყვეტილებას.
12. კომისიის მიერ გაცემული საბუთის მიღებას განმცხადებელი ადასტურებს სარეგისტრაციო ჟურნალში ხელმოწერით.

#### მუხლი 15. საარჩევნო ადმინისტრაციის აქტები

1. საარჩევნო ადმინისტრაციის აქტებია:
  - ა) საარჩევნო კომისიის დადგენილება;
  - ბ) საარჩევნო კომისიის თავმჯდომარის ბრძანება.
2. საარჩევნო კომისიის, თავმჯდომარის ბრძანება არის ინდივიდუალური აქტი, რომელიც მიღება და გამოიცემა მისი კომპეტენციის ფარგლებში. საარჩევნო კომისიის დადგენილებას ხელს აწერენ კომისიის თავმჯდომარე და კომისიის მდივანი. კომისიის დადგენილება მიღებულად ჩაითვლება, თუ მას მხარს დაუჭერს სხდომის დამსწრეთა უმრავლესობა, მაგრამ არანაკლებ კომისიის სრული შემადგენლობის ერთი მესამედისა.
3. საარჩევნო ადმინისტრაციის აქტების შესრულება სავალდებულოა არჩევნებში მონაწილე ყველა პირისათვის.

#### მუხლი 16. საარჩევნო კომისიის უფლებამოსილება

1. საარჩევნო კომისია თავისი უფლებამოსილების ფარგლებში:
- ა) უზრუნველყოფს არჩევნების გამართვას, აკონტროლებს ამ დებულების შესრულებას;
- ბ) თუ შეუძლებელი გახდა ამ დებულებით დადგენილი გარკვეული მოთხოვნების შესრულება და ვადების დაცვა, უფლებამოსილია დადგენილებით განსაზღვროს

საარჩევნო ღონისძიებები და მათი ვადები; ასევე, აუცილებლობის შემთხვევაში, სტუ-ის სტუდენტური თვითმმართველობის გამგეობას წარუდგინოს წინადადება ახალი არჩევნების თარიღის დანიშვნის თაობაზე;

გ) უზრუნველყოფს საარჩევნო საბუთების, საარჩევნო კომისიის ბეჭდის დამზადებასა და საუბნო საარჩევნო კომისიების მომარაგებას;

დ) ამ დებულებით განსაზღვრული ვადების შესაბამისად ადგენს საარჩევნო ღონისძიებათა გრაფიკს;

ე) ამტკიცებს განმეორებითი კენჭისყრის დღეს;

ვ) საჩივრის შემოსვლის შემთხვევაში იღებს გადაწყვეტილებას შესაბამისი საარჩევნო უბნიდან, კომისიიდან შემოსული პაკეტების გახსნის, საარჩევნო ბიულეტენების ხელახლა დათვლის, ასევე ამომრჩეველთა სიების გადამოწმების შესახებ;

ზ) საარჩევნო უბნების შედეგების შემაჯამებელი ოქმების საფუძველზე ადგენს სტუ-ის ფაკულტეტების მიხედვით ფაკულტეტის სტუდენტური თვითმმართველობის არჩევნების შედეგებს და დადგენილებით სრული შემადგენლობის ორი მესამედით ამტკიცებს შემაჯამებელ ოქმს;

თ) ანიჭებს დამკვირვებლის სტატუსს;

ლ) უზრუნველყოფს საინფორმაციო მასალის გამოქვეყნებასა და გავრცელებას;

ი) განიხილავს არჩევნებთან დაკავშირებულ განცხადებებსა და საჩივრებს და თავისი უფლებამოსილების ფარგლებში იღებს სათანადო გადაწყვეტილებას;

კ) ადგენს ამომრჩეველთა ერთიან სიას, ახდენს მის კომპიუტერულ დამუშავებასა და საჯარო ინფორმაციისათვის განკუთვნილი ნაწილის ინტერნეტში განთავსებას;

ლ) ატარებს წილისყრას კანდიდატებისათვის ნორმის მისანიჭებლად;

მ) ახორციელებს ამ დებულებით მინიჭებულ სხვა უფლებამოსილებას.

2. საარჩევნო კომისია სტუდენტური თვითმმართველობის არჩევნებთან დაკავშირებით ყველა იმ საკითხთან მიმართებაში რომელიც კანონით დადგენილი ნორმების შესაბამისად საჭიროებს უნივერსიტეტის ადმინისტრაციის მხრიდან დახმარებას არჩევნების პროცესის სრულყოფილად წარმართვაში პერიოდულად მიმართავს წერილობით უნივერსიტეტის ადმინისტრაციას.

#### მუხლი 17. საარჩევნო კომისიის აპარატი

1. არჩევნების ჩატარების ორგანიზაციული, სამართლებრივი და ტექნიკური უზრუნველყოფის მიზნით შეიძლება შეიქმნას საარჩევნო კომისიის აპარატი.

2. აპარატის სტრუქტურა, საქმიანობის წესი და უფლებამოსილებას განსაზღვრავს საარჩევნო კომისია.

#### თავი V - საარჩევნო სუბიექტთა რეგისტრაცია

#### მუხლი 18. საარჩევნო სუბიექტთა რეგისტრაცია

1. ფაკულტეტის სტუდენტური თვითმმართველობის არჩევნებში მონაწილოების უფლება აქვს სტუ-ის ნებისმიერ აქტიური სტატუსის მქონე სტუდენტს ფაკულტეტის მიხედვით, რომელიც გაივლის რეგისტრაციას ამ დებულების შესაბამისად.

## მუხლი 19. საარჩევნო სუბიექტთა რეგისტრაცია (კრიტერიუმები)

1. არჩევნებში კანდიდატები რეგისტრირდებიან ინდივიდუალურად სტუდენტური თვითმმართველობის გამგეობის მიერ არჩევნების გამოცხადების შესახებ დადგენილების გამოცემიდან 7 დღის შემდეგ, 2022 წლის 12 დეკემბრის 10:00 საათიდან - 18 დეკემბრის 17:00 საათამდე. მათ რეგისტრაციის გავლის მიზნით ფაკულტეტის საარჩევნო კომისიაში უნდა წარმოადგინონ პირადობის დამადასტურებელი მოწმობის ასლი და ცნობა სტუდენტის სტატუსის შესახებ ფაკულტეტის დეკანატიდან.

## თავი VI - არჩევნების დაფინანსება

### მუხლი 20. არჩევნების დაფინანსება

1. სტუდენტური თვითმმართველობის არჩევნებს აფინასებს უნივერსიტეტი.
2. უნივერსიტეტის ადმინისტრაციასთან შეთანხმებით საარჩევნო კომისიას უფლება აქვს მიიღოს გრანტი.
3. აკრძალულია არჩევნების ორგანიზებისათვის საარჩევნო კომისიის მიერ სხვა თანხების გამოყენება.

## თავი VII - კენჭისყრა

### მუხლი 21. კენჭისყრის დრო და ადგილი

1. საარჩევნო კომისია (უბანი) იხსნება დილის რვა საათზე. კენჭისყრა იწყება დილის ცხრა საათზე და სრულდება საღამოს რვა საათზე.
2. კენჭისყრის დროს აკრძალულია კენჭისყრის შეწყვეტა ან შეჩერება, გარდა იმ შემთხვევისა, როდესაც შეუძლებელია არჩევნების საყოველთაობის, თანასწორობისა და ამომრჩეველთა ნების თავისუფალი გამოვლენის უზრუნველყოფა.
3. კენჭისყრა ტარდება არანაკლებ 12 საარჩევნო უბანზე სპეციალურად მომზადებულ საარჩევნო ადგილას.

### მუხლი 22. საარჩევნო ბიულეტენი

1. საარჩევნო ბიულეტენი იბეჭდება ცენტრალური საარჩევნო კომისიის დადგენილების საფუძველზე, განსაზღვრული ნიმუშის მიხედვით, ბიულეტინები ფაკულტეტების მიხედვით შეიძლება დაიბეჭდოს სხვადასხვა ფერად.
2. საარჩევნო ბიულეტენების დაბეჭდვასა და საარჩევნო ყუთის დამზადებას უზრუნველყოფს საარჩევნო კომისია, ბიულეტენები იბეჭდება საარჩევნო კომისიის მიერ უფლებამოსილ პირთა და დამკვირვებელთა მუდმივი მეთვალყურეობით. ბიულეტენების დაბეჭდვის პროცესზე დაკვირვების უფლება აქვთ (მათი დამზადების თითოეულ ადგილზე) საარჩევნო კომისიის დადგენილებით დანიშნულ კომისიის 2

წევრსა და რეგისტრირებულ დამკვირვებელ ორგანიზაციებს, ასევე საარჩევნო სუბიექტის წარმომადგენლებს, რომლებიც შეთანხმების საფუძველზე წარადგენენ არა უმეტეს 3 დამკვირვებელს.

3. ბიულეტენების დაბეჭდვის დაკვეთის შემსრულებელი პირადად აგებს პასუხს, რომ დაბეჭდილი და საარჩევნო კომისიისთვის გადაცემული ბიულეტენების რაოდენობა ზუსტად შეესაბამებოდეს დაკვეთილ რაოდენობას.

4. საარჩევნო კომისია საარჩევნო ბიულეტენებს კენჭისყრის დაწყებამდე 1 საათით ადრე გადასცემს საარჩევნო უბნებს.

5. საარჩევნო ბიულეტენზე აღნიშნული უნდა იყოს:

ა) არჩევნების დასახელება და არჩევნების ჩატარების თარიღი;

ბ) ფაკულტეტის დასახელება და ნომერი;

გ) საარჩევნო ბიულეტენის შევსების წესი.

5. საარჩევნო ბიულეტენზე აღნიშნული უნდა იყოს საარჩევნო კომისიის წევრის-რეგისტრაციონის ხელმოწერის ადგილი.

6. საარჩევნო ბიულეტენი წარმოადგენს უნივერსიტეტის საკუთრებას. კენჭისყრის დღეს აკრძალულია კენჭისყრის შენობიდან მისი გატანა ან განადგურება.

#### მუხლი 23. კენჭისყრისა და არჩევნების შედეგების შემაჯამებელი ოქმები

1. კენჭისყრისა და არჩევნების შედეგები აისახება საარჩევნო უბნების შემაჯამებელ ოქმებსა და საარჩევნო კომისიის კენჭისყრისა და არჩევნების შედეგების შემაჯამებელ ოქმში.

2. შემაჯამებელი ოქმი არის კენჭისყრისა და არჩევნების შედეგების დამადასტურებელი აქტი. ოქმის ყველა ეგზემპლარს ერთნაირი მაღა აქვს.

3. აკრძალულია შემაჯამებელ ოქმში შეტანილი მონაცემების გადასწორება. ასეთი ოქმი ბათილია. თუ შემაჯამებელი ოქმის შევსებისას დაშვებულ იქნა შეცდომა, მის გამოსასწორებლად შემაჯამებელ ოქმში, შესაბამისი მონაცემის გასწვრივ, მაშინვე კეთდება წარწერა „შესწორებულია“ და საარჩევნო კომისიამ უნდა შეადგინოს ოქმი, რომელშიც აღინიშნება შემაჯამებელ ოქმში შეტანილი მონაცემის შესწორება და ამ ოქმის შედგენის თარიღი და დრო. ამ ოქმს ხელს აწერს კომისიის ყველა წევრი, რომელიც ესწრება სხდომას, ოქმს დაესმება კომისიის ბეჭედი, გატარდება კომისიის სარეგისტრაციო ჟურნალში და დაერთვება იმ შემაჯამებელ ოქმს, რომელშიც შეტანილი მონაცემები იქნა შესწორებული.

4. საარჩევნო კომისიაში ოქმების შენახვისათვის პირადად აგებენ პასუხს საარჩევნო კომისიის თავმჯდომარე და კომისიის მდივანი.

#### მუხლი 24. დამკვირვებლები

1. დამკვირვებელი ორგანიზაცია არჩევნებზე დაკვირვებას ახორციელებს ორგანიზაციის წარმომადგენლის – დამკვირვებლის მეშვეობით. ერთ ორგანიზაციას უფლება აქვს კონკრეტულ საარჩევნო უბანში ჰყავდეს არა უმეტეს ერთი დამკვირვებლისა.

## მუხლი 25. დამკვირვებელთა რეგისტრაცია

1. რეგისტრაციაში გატარების მიზნით ორგანიზაციის დამკვირვებელმა განცხადებით უნდა მიმართოს საარჩევნო კომისიას არჩევნების ჩატარებამდე არა უგვიანეს 7 დღისა და წარუდგინოს თავისი წესდების სანოტარო წესით დამოწმებული ასლი. განცხადებაში უნდა აღინიშნოს იმ ფაკულტეტების დასახელება, რომელშიც ორგანიზაცია განახორციელებს დაკვირვებას. საარჩევნო კომისია განცხადების მიღებიდან 2 დღის ვადაში გადაწყვეტს ორგანიზაციის რეგისტრაციის საკითხს.
2. საარჩევნო კომისიას უფლება არ აქვს დამკვირვებელ ორგანიზაციას უარი უთხრას რეგისტრაციაზე, თუ იგი აკმაყოფილებს ამ დებულებით დადგენილ მოთხოვნებს. საარჩევნო კომისიის დადგენილება რეგისტრაციაზე უარის თქმის შესახებ დასაბუთდეს და გადაეცეს ორგანიზაციას გადაწყვეტილების მიღებიდან არა უგვიანეს მომდევნო დღისა.
3. საარჩევნო კომისიის მდივანი ვალდებულია, დამკვირვებელთა სიის წარდგენიდან არა უგვიანეს ერთი დღისა რეგისტრაციაში გაატაროს ამ დებულების მოთხოვნათა დაცვით წარდგენილი დამკვირვებელი და დამკვირვებელ ორგანიზაციას გადასცეს დამკვირვებლის მოწმობა, რომელიც იმავდროულად წარმოადგენს სამკერდე ნიშანს.
4. დამკვირვებლის მოწმობაში მითითებული უნდა იყოს:
  - ა) დამკვირვებლის გვარი, სახელი;
  - ბ) წარმდგენი ორგანიზაციის სახელწოდება;
  - გ) იმ ფაკულტეტის დასახელება (დასახელებები), სადაც უნდა განახორციელოს დაკვირვება.

## მუხლი 26. საარჩევნო უბნის გახსნა

1. საარჩევნო უბანი იხსნება კენჭისყრის დღის 9.00 საათზე, რაც გახსნისთანავე უნდა ეცნობოს ცენტრალურ საარჩევნო კომისიას.

## მუხლი 27. საარჩევნო ბიულეტენის გაცემა

1. საარჩევნო კომისია საარჩევნო ბიულეტენს გასცემს ამომრჩეველთა სიის საფუძველზე, პირადობის მოწმობის ან პასპორტთან ერთად,
2. კენჭისყრის დღეს ყოველ ამომრჩეველზე გაიცემა ერთი საარჩევნო ბიულეტენი.
3. საარჩევნო ბიულეტენის (ბიულეტენების) გაცემისას ამომრჩეველთა სიის სათანადო გრაფებში შეიტანება ან დადასტურდება პირადობის მოწმობის ნომერი. ბიულეტენის (ბიულეტენების) გაცემას ადასტურებს რეგისტრატორი ამომრჩეველთა სიაში ხელმოწერით.
4. ამომრჩეველი საარჩევნო ბიულეტენის (ბიულეტენების) მიღებას ადასტურებს ამომრჩეველთა სიაში ხელმოწერით.

## მუხლი 28. კენჭისყრის ჩატარება

1. თითოეული ამომრჩეველი ხმას აძლევს პირადად პირადობის დამადასტურებელი მოწმობის ან პასპორტის წარდგენის საფუძველზე. დაუშვებელია ხმის მიცემა სხვა პირის ნაცვლად.
2. ამომრჩევლის სიაში ყოფნის დადასტურების შემთხვევაში ამომრჩეველთა სიაში მისი მონაცემების ნომრის შეტანის შემდეგ ხელის მოწერით ადასტურებს საარჩევნო ბიულეტენის მიღებას. ბიულეტენის გაცემისას რეგისტრატორი ხელს აწერს ბიულეტენის სათანადო გრაფასა და ამომრჩეველთა სიაში.
3. ბიულეტენის მიღების შემდეგ ამომრჩეველი შედის ფარული კენჭისყრის კაბინაში და ავსებს საარჩევნო ბიულეტენს ამ დებულების შესაბამისად დადგენილი წესით. ბიულეტენის შევსების შემდეგ ამომრჩეველმა ის ისე უნდა დაკეცოს, რომ არ ჩანდეს ვის მისცა ხმა.
4. შემდგომ ამომრჩეველი ათავსებს ბიულეტენს საარჩევნო ყუთში და ტოვებს კენჭისყრის ოთახს.
5. საარჩევნო ყუთთან ერთდროულად ერთზე მეტი ამომრჩევლის მისვლა იკრძალება.
6. საარჩევნო ყუთთან მუდმივად უნდა იმყოფებოდეს საარჩევნო ყუთზე ზედამხედველი კომისიის წევრი. მას დახურული უნდა ჰქონდეს ბიულეტენის ჩასაგდები ჭრილი, რომელიც უნდა გახსნას მხოლოდ მას შემდეგ, რაც დარწმუნდება, რომ ამომრჩეველს ხელში მხოლოდ ერთი ბიულეტენი აქვს.
7. კენჭისყრის დასრულების შემდეგ ილუქება საარჩევნო ყუთში ბიულეტენების ჩასაგდები ჭრილი.
8. თუ ამომრჩეველს ან საარჩევნო კომისიის წევრს გაფუჭდა საარჩევნო ბიულეტენი, მან ამის შესახებ უნდა აცნობოს საარჩევნო კომისიის თავმჯდომარეს, ჩააბაროს გაფუჭებული საარჩევნო ბიულეტენი და მიიღოს ახალი. გაფუჭებულ საარჩევნო ბიულეტენს ამომრჩევლის თანდასწრებით ჩამოეჭრება კუთხე, წაეწერება „გაფუჭებულია“, ხელს მოაწერს კომისიის თავმჯდომარე და იგი ცალკე შეინახება.
9. თუ კენჭისყრის დროს დაირღვა საარჩევნო ყუთის ლუქის მთლიანობა, საარჩევნო კომისია აჩერებს კენჭისყრის პროცესს და დადგენილებით იღებს გადაწყვეტილებას საარჩევნო ყუთის ხელახლა დალუქვისა და კენჭისყრის გაგრძელების საკითხის თაობაზე.
10. კენჭისყრის ოთახი იკეტება 20:00 საათზე. ამ დროისათვის რიგში მდგომ ამომრჩევლებს შეუძლიათ ხმის მიცემა. საარჩევნო კომისიის თავმჯდომარე აღნიშნავს რიგში მდგომი ამომრჩევლების გვარსა და სახელს, რომელთაც შეუძლიათ არჩვნებში მონაწილეობა.

## მუხლი 29. კენჭისყრის დღეს კენჭისყრის ოთახში წესრიგის დაცვა

1. კენჭისყრის დღეს კენჭისყრის ოთახში წესრიგის დაცვას ხელმძღვანელობს და მასზე პასუხისმგებელია საარჩევნო კომისიის თავმჯდომარე.
2. საარჩევნო კომისიის თავმჯდომარის მიერ კენჭისყრის ოთახში წესრიგის დაცვის მიზნით მიღებულ გადაწყვეტილებათა შესრულება სავალდებულოა საარჩევნო კომისიის

წევრებისათვის, კენჭისყრის ოთახში ყოფნის უფლების მქონე ყველა პირისა და ამომრჩევლისათვის.

3. დაუშვებელია კენჭისყრის ოთახში შეიარაღებულ პირთა შესვლა.

4. თუ კენჭისყრის ოთახში ან მის მიმდებარე ტერიტორიაზე საფრთხე ექმნება ამ დებულების მოთხოვნათა შესაბამისად კენჭისყრის ჩატარებას ან საარჩევნო დოკუმენტაციის უსაფრთხო გადაადგილებას, საარჩევნო კომისიის თავმჯდომარის მოთხოვნით შეიძლება გამოძახებულ იქნენ და კენჭისყრის შენობის მიმდებარე ტერიტორიაზე იმყოფებოდნენ უნივერსიტეტის დაცვის თანამშრომლები ან პოლიციის მუშაკები. საზოგადოებრივი წესრიგის დარღვევის აღკვეთისთანავე და საარჩევნო კომისიის თავმჯდომარის თანხმობის შემთხვევაში პოლიციის მუშაკები ტოვებენ კენჭისყრის ოთახს.

#### მუხლი 30. საარჩევნო ყუთის გახსნამდე ჩასატარებელი პროცედურები

1. კენჭისყრის დამთავრების შემდეგ საარჩევნო კომისიის თავმჯდომარე კენჭისყრის ოთახში ყოფნის უფლების მქონე პირთა თანდასწრებით კომისიის წევრებისგან წილისყრით შეარჩევს არანაკლებ სამ დამთვლელს, ხოლო დამკირვებლები თავისი შემადგენლობიდან ურთიერთშეთანხმებით შეარჩევენ არა უმეტეს ორ მეთვალყურეს (თუ დამკირვებლები ვერ შეთანხმდნენ, მათგან ორ მეთვალყურეს წილისყრით გამოავლენს საარჩევნო კომისიის თავმჯდომარე).

2. დამთვლელები თანმიმდევრულად ითვლიან ამომრჩეველთა ერთიანი სიის მიხედვით კენჭისყრაში მონაწილე ამომრჩეველთა საერთო რაოდენობას. შედეგები საარჩევნო კომისიის მდივანს დაუყოვნებლივ შეაქვს კენჭისყრის შედეგების შემაჯამებელ შესაბამის ოქმში, რის შემდეგაც ცალ-ცალკე შეფუთავს და დალუქავს ერთიანად.

3. დამთვლელები შემდეგი თანმიმდევრობით ითვლიან და პაკეტებად კრავენ:

ა) გამოუყენებელ საარჩევნო ბიულეტენებს, რომელთა რაოდენობა საარჩევნო კომისიის მდივანს დაუყოვნებლივ შეაქვს კენჭისყრის შედეგების შემაჯამებელ შესაბამის ოქმში.

ბ) გაფუჭებულ საარჩევნო ბიულეტენებს, რომელთა რაოდენობა საარჩევნო კომისიის მდივანს დაუყოვნებლივ შეაქვს კენჭისყრის შედეგების შემაჯამებელ შესაბამის ოქმში, პაკეტზე იწერება გაფუჭებულ ბიულეტენთა რაოდენობა.

4. თითოეულ პაკეტს უნდა დაეწეროს საარჩევნო უბნის დასახელება, გამოუყენებელ და გაფუჭებულ საარჩევნო ბიულეტენთა რაოდენობა.

5. პაკეტები უნდა დაილუქოს და მათ ხელი უნდა მოაწერონ დამთვლელებმა და საარჩევნო კომისიის თავმჯდომარემ.

#### მუხლი 31. საარჩევნო ყუთის გახსნა

1. საარჩევნო კომისიის თავმჯდომარე კომისიის წევრებისა და კენჭისყრის ოთახში ყოფნის უფლების მქონე პირთა თანდასწრებით ამოწმებს საარჩევნო ყუთზე ლუქის მთლიანობას.

2. თუ ლუქის მთლიანობა დარღვეულია, მაგრამ საარჩევნო კომისია მიიჩნევს, რომ ამას არ გამოუწევია ამ დებულების მოთხოვნათა დარღვევა, საარჩევნო კომისიის

დადგენილებით გრძელდება კენჭისყრის შედეგების შეჯამების პროცედურა. წინააღმდეგ შემთხვევაში საარჩევნო ყუთი ილუქება და გადაეცემა საარჩევნო კომისიას.

3. დამთვლელები საარჩევნო ყუთში არსებულ საარჩევნო ბიულეტენებს ათავსებენ განცალკევებით მდგომ მაგიდაზე, ამოწმებენ საარჩევნო ყუთში საკონტროლო ფურცლის არსებობას და ადარებენ მას საარჩევნო კომისიაში შენახულ საკონტროლო ფურცელს. თუ საკონტროლო ფურცლებს შორის განსხვავება გამოვლინდა ან ყუთში საკონტროლო ფურცელი არ აღმოჩნდა, ყველა საარჩევნო ბიულეტენი შეიფუთება, დაილუქება, შედგება სათანადო ოქმი და დაუყოვნებლივ გადაეცემა საარჩევნო კომისიას. თუ ყველაფერი წესრიგში აღმოჩნდა, დამთვლელები საარჩევნო ყუთიდან გადმოყრიან საარჩევნო ბიულეტენებს და იწყებენ საარჩევნო ბიულეტენების დათვლას.

### მუხლი 32. ხმის დათვლა

1. საარჩევნო კომისია საარჩევნო ბიულეტენებს ითვლის შემდეგი წესის დაცვით:

- ა) დამთვლელები საარჩევნო ბიულეტენებს აწყობენ;
- ბ) ცალკე ეწყობა დაუდგენელი ნიმუშის და დამთვლელების მიერ ბათილად მიჩნეული საარჩევნო ბიულეტენები.

2. დამკირვებელთაგან გამოვლენილი მეთვალყურე აკვირდება დათვლის მთელ პროცედურას.

3. დადგენილი ნიმუშის საარჩევნო ბიულეტენი მხოლოდ იმ შემთხვევაში მიიჩნევა ბათილად, თუ:

- ა) საარჩევნო ბიულეტენი დამოწმებული არ არის რეგისტრატორის ხელმოწერით;
- ბ) შეუძლებელია იმის დადგენა, რომელ საარჩევნო სუბიექტებს მისცა ხმა ამომრჩეველმა ან ხმა მიცემული აქვს ფაკულტეტზე დადგენილი მაქსიმალური რაოდენობის მანდატზე მეტ საარჩევნო სუბიექტზე;
- გ) საარჩევნო ბიულეტენი განკუთვნილი იყო სხვა საარჩევნო უბნისათვის.

4. ამ მუხლის მე-3 პუნქტში აღნიშნული პროცედურის დასრულების შემდეგ ითვლება ბათილად მიჩნეული საარჩევნო ბიულეტენები და მათ ეწერება „ბათილია“, რასაც ხელს აწერენ დამთვლელები და საარჩევნო კომისიის თავმჯდომარე. ეს ბიულეტენები პაკეტად იკვრება და მათ რაოდენობას საარჩევნო კომისიის მდივანი დაუყოვნებლივ აღნიშნავს კენჭისყრის შედეგების შემაჯამებელ ოქმში, სხვა საარჩევნო უბნისათვის განკუთვნილი ბათილი ბიულეტენები ცალკე პაკეტად იკვრება და მათი რაოდენობა აღინიშნება მხოლოდ სარეგისტრაციო ჟურნალში.

### მუხლი 33. კენჭისყრის შედეგების შემაჯამებელი ოქმი

1. ამ დებულებით განსაზღვრული პროცედურების დასრულების შემდეგ კომისიის მდივანი საარჩევნო კომისიისთვის განკუთვნილი შემაჯამებელი ოქმის მიხედვით ავსებს კენჭისყრის შედეგების შემაჯამებელ ოქმს.

2. კენჭისყრის შედეგების შემაჯამებელ ოქმში აღინიშნება:

- ა) არჩევნების დასახელება;
- ბ) საარჩევნო უბნის დასახელება და ნომერი;
- გ) კენჭისყრის თარიღი (განმეორებითი კენჭისყრის შემთხვევაში – ეს გარემოებაც);

- დ) ამომრჩეველთა საერთო რაოდენობა;
- ე) არჩევნებში მონაწილე ამომრჩეველთა საერთო რაოდენობა (ამომრჩეველთა სიებში ხელმოწერების მიხედვით);
- ვ) მიღებულ საარჩევნო ბიულეტენთა რაოდენობა;
- ზ) გამოუყენებელ საარჩევნო ბიულეტენთა რაოდენობა;
- თ) გაფუჭებულ საარჩევნო ბიულეტენთა რაოდენობა;
- ი) ბათილად მიჩნეულ საარჩევნო ბიულეტენთა რაოდენობა;
- კ) საარჩევნო სუბიექტებისათვის და ყველას წინააღმდეგ მიცემულ ხმათა რაოდენობა;
- ლ) შესაბამის საარჩევნო უბნებში არჩეულ პირთა ვინაობა;
- მ) ნამდვილი ბიულეტენების რაოდენობა (საარჩევნო სუბიექტებისათვის მიცემულ ხმათა რაოდენობისა და ყველას წინააღმდეგ მიცემულ ხმათა რაოდენობის ჯამი);
- ნ) საჩივრების ჩამონათვალი (წარმდგენის ვინაობა, მიღების დრო);
- ო) ოქმის დამტკიცების თარიღი და დრო;
- პ) ოქმის ის მონაცემები, რომლებსაც არ ეთანხმება კომისიის წევრი (ამ ჩანაწერს კომისიის წევრი აკეთებს გრაფაში „განსხვავებული აზრი“ და ხელს აწერს მას);
- ჟ) ოქმის სარეგისტრაციო ნომერი, რეგისტრაციის თარიღი და დრო (აღინიშნება ოქმის გაცემისას);
- რ) ამ დებულებით გათვალისწინებული სხვა მონაცემები.
3. საუბნო საარჩევნო კომისიის ყველა წევრი ვალდებულია ხელი მოაწეროს ოქმს, რითაც დასტურდება მათი ყოფნა საარჩევნო უბანზე. ოქმი უნდა დამოწმდეს საარჩევნო კომისიის ბეჭდით.
4. თუ საუბნო საარჩევნო კომისიის წევრი არ ეთანხმება ოქმში შეტანილ მონაცემებს, მას უფლება აქვს ოქმს წერილობით დაურთოს განსხვავებული აზრი.
5. განსხვავებული აზრის გამოთქმის შემთხვევაში საუბნო საარჩევნო კომისიის წევრი ვალდებულია ხელი მოაწეროს კენჭისყრის შედეგების შემაჯამებელ ოქმს.
6. თითოეულ საარჩევნო უბანზე ფორმდება შესაბამისი შემაჯამებელი ოქმი.

**მუხლი 34. განცხადებები და საჩივრები კენჭისყრისა და ხმის დათვლის პროცედურების დარღვევებზე**

1. განცხადება (საჩივარი) საარჩევნო უბანში კენჭისყრის პროცედურის დარღვევის შესახებ შედგენილ უნდა იქნეს ამ დებულების დარღვევის შემჩნევისთანავე, კენჭისყრის დღის დილის 9 საათიდან საარჩევნო პროცესის დამთავრებამდე.
2. განცხადებაში (საჩივარში) აღინიშნება:

  - ა) განცხადების (საჩივრის) შედგენის თარიღი და დრო;
  - ბ) განმცხადებლის (მომჩივნის) სახელი, გვარი და ფაკულტეტი;
  - გ) საარჩევნო უბნის დასახელება და ნომერი;
  - დ) დარღვევის არსი და მისი ჩადენის დრო;
  - ე) მოწმის არსებობის შემთხვევაში, მისი სახელი, გვარი და ფაკულტეტი;
  - ვ) დამრღვევის დადგენის შემთხვევაში, მისი ის მონაცემები, რომელთა დადგენა შესაძლებელი გახდა;
  - ზ) დამრღვევის ახსნა-განმარტება (ასეთის არსებობის შემთხვევაში);

თ) სხვა დამატებითი ინფორმაცია.

3. განცხადება (საჩივარი) კენჭისყრის პროცედურის დროს ჩადენილი დარღვევის შესახებ უნდა გადაეცეს საარჩევნო კომისიის თავმჯდომარეს, მის მოადგილეს ან კომისიის მდივანს, რომელიც დაარეგისტრირებს მას სარეგისტრაციო ჟურნალში, ხოლო განცხადებელს გადასცემს ცნობას (თავისი ხელმოწერით), რომელშიც აღინიშნება შესაბამისი განცხადების (საჩივრის) კომისიაში მიღების თარიღი და დრო.
4. საარჩევნო კომისიის თავმჯდომარე ვალდებულია დაუყოვნებლივ მოახდინოს სათანადო რეაგირება განცხადებაზე (საჩივარზე) და აღმოფხვრას არსებული დარღვევა ან დასაბუთებული უარი განაცხადოს მის შესრულებაზე.
5. საარჩევნო კომისიის ჟურნალი იხურება კომისიის მდივნისა და კომისიის წევრთა ხელმოწერით და მოწმდება საარჩევნო კომისიის ბეჭდით.
6. საარჩევნო კომისიის ჟურნალი და შემოსული განცხადებები (საჩივრები) ილუქება ცალ-ცალკე და იკვრება ერთ პაკეტად.
7. საარჩევნო კომისიის ბეჭედი ილუქება ცალკე პაკეტში. პაკეტს ხელს აწერენ საარჩევნო კომისიის თავმჯდომარე, კომისიის მდივანი და კომისიის სხვა წევრები.

#### მუხლი 35. კენჭისყრისა და არჩევნების შედეგების შეჯამება საარჩევნო კომისიაში

1. საარჩევნო კომისია უბნების მიხედვით შემაჯამებელი ოქმების საფუძველზე, ამ დებულების დარღვევის განხილვის შედეგების გათვალისწინებით, კენჭისყრიდან არაუგვიანეს მე-2 დღისა აჯამებს არჩევნების შედეგებს, ადგენს უნივერსიტეტის თვითმართველობის არჩევნების შედეგებს ფაკულტეტების მიხედვით და ამტკიცებს არჩევნების შედეგების შემაჯამებელ ოქმს.
2. აკრძალულია საარჩევნო კომისიის მიერ არჩევნების შედეგების შეჯამება საარჩევნო დავების დასრულებამდე და მიღებული გადაწყვეტილებების სრულად გათვალისწინების გარეშე.
3. არჩევნები ჩატარებულად ითვლება, თუ მასში მონაწილეობას მიიღებს ფაკულტეტის სტუდენტთა სრული რაოდენობის მინიმუმ  $1/4$ , წინააღმდეგ შემთხვევაში საარჩევნო კომისია მოქმედი სტუდენტური თვითმმართველობის გამგეობასთან შეთანხმებით უზრუნველყოფს ხელახალი არჩევნების ჩატარებას არჩევნების ჩამოცხადების შემთხვევაში დაინიშნოს იმ სასწავლო პერიოდში, როცა სტუდენტთა აქტიურობა იქნება მაღალი.
4. საარჩევნო კომისიის დადგენილებით სრული შემადგენლობის ორი მესამედით ამტკიცებს კენჭისყრის (არჩევნების) შედეგების შემაჯამებელ ოქმს.
6. არჩევნების შედეგების შემაჯამებელ ოქმში აღინიშნება არჩეული პირის (არჩეულ პირთა) ვინაობა.
7. თუ საარჩევნო კომისიამ ბათილად ცნო კენჭისყრის შედეგები საარჩევნო უბანში ამ უბანში (უბნებში) იმართება განმეორებითი კენჭისყრა.
8. საარჩევნო კომისიის ყველა წევრი, რომელიც ესწრება კომისიის სხდომას, ვალდებულია ხელი მოაწეროს კენჭისყრის (არჩევნების) შედეგების შემაჯამებელ ოქმს. ოქმი დამოწმდება საარჩევნო კომისიის ბეჭდით.

9. თუ საარჩევნო კომისიის წევრი არ ეთანხმება ოქმში შეტანილ მონაცემებს, მას უფლება აქვს ოქმში აღნიშნოს, რას არ ეთანხმება და ოქმს წერილობით დაურთოს განსხვავებული აზრი.

10. საარჩევნო კომისია არჩევნების შედეგების შემაჯამებელი ოქმის ასლს (კომისიის წევრთა თანდართული განსხვავებული აზრებით), რომელიც დამოწმებულ უნდა იქნეს საარჩევნო კომისიის ბეჭდითა და თავმჯდომარისა და მდივნის ხელმოწერებით, აგრეთვე დადგენილებებს საარჩევნო კომისიების შემაჯამებელ ოქმებში ცვლილებების შეტანის შესახებ (თუ ასეთი ცვლილებები იქნა შეტანილი) დაუყოვნებლივ გადასცემს სტუ-ის სტუდენტურ თვითმმართველობას.

## თავი VIII - დასკვნითი დებულებები

### მუხლი 36. მანდატის მიკუთვნება

1. არჩევნებში გამარჯვებულად ჩაითვლება უკეთესი შედეგის მქონე კანდიდატი შესაბამის ფაკულტეტზე დადგენილი მანდატების (ვაკანტური ადგილი) რაოდენობის გათვალისწინებით.
2. ფაკულტეტების მიხედვით დადგენილია მანდატების (ვაკანტური ადგილი) შემდეგი რაოდენობა:
  1. სამშენებლო ფაკულტეტი - 76 მანდატი.
  2. ენერგეტიკის ფაკულტეტი - 53 მანდატი.
  3. სამთო-გეოლოგიური ფაკულტეტი - 41 მანდატი.
  4. ქიმიური ტექნოლოგიისა და მეტალურგიის ფაკულტეტი - 59 მანდატი.
  5. სატრანსპორტო სისტემებისა და მექანიკის ინჟინერიის ფაკულტეტი - 51 მანდატი.
  6. არქიტექტურის, ურბანისტიკისა და დიზაინის ფაკულტეტი - 27 მანდატი.
  7. სამართლისა და საერთაშორისო ურთიერთობების ფაკულტეტი - 61 მანდატი.
  8. ბიზნესტექნოლოგიების ფაკულტეტი - 50 მანდატი.
  9. საინჟინრო ეკონომიკის, მედიატექნოლოგიებისა და სოციალურ მეცნიერებათა ფაკულტეტი - 59 მანდატი.
  10. ინფორმატიკისა და მართვის სისტემების ფაკულტეტი - 140 მანდატი.
  11. აგრარული მეცნიერებების და ბიოსისტემების ინჟინერინგის ფაკულტეტი - 38 მანდატი.
  12. დიზაინის საერთაშორისო სკოლა - 6 მანდატი.

### მუხლი 37. უნივერსიტეტის სტუდენტური თვითმმართველობის პირველი სხდომა

1. ფაკულტეტის თვითმმართველობა იკრიბება არჩევნების შედეგების გამოცხადებიდან 1 თვის ვადაში და ირჩევს ფაკულტეტის სტუდენტური თვითმმართველობის თავმჯდომარეს, ასევე ფაკულტეტის წარმომადგენელს სტუდენტური თვითმმართველობის გამგეობაში.

2. სტუ-ის ფაკულტეტებზე არჩეული სტუდენტური თვითმმართველობის წევრები იკრიბებიან არჩევნების შედეგების გამოცხადებიდან 1 თვის ვადაში თვითმმართველობის წევრთა საერთო კრებაზე.

თავი IX - გარდამავალი დებულებები

მუხლი 38. არჩევნების ჩატარების თარიღი

არჩევნები ტარდება 2022 წლის 26 დეკემბერს.